

Ilaqutarittut inuunermut iluaqutaanerumik sulisoqarnermut politikkeqalernissaq anguniarlugu Naalakkersuisut UPA2017-mut iliuusissanik nassuiaasiornissamik peqquneqarnissaannik Inatsisartut aaliangiiffigisassaattut siunnersuut.

(Inatsisartunut ilaasortaqaq Sara Olsvig, Inuit Ataqtigiit)

Akissuteqaat

(Inussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Siullermeerinnineq

Aallaqqaasiullugu Naalakkersuisut qujassutigisavaat siunnersuummut kusanartumut.

Inimi maani inuiaqatigiinnilu oqallisissatut saqqummiussaq soqutiginarpoq. Siunissami su-liassanut naammattunik sulisoqarnissaa qanoq iliorluta qulakkiissavarput?

Suliffeqarnermi pissutsinik misissugassaqaarpugut aaqqitassaqaarlutalu, taamaalilluni ilaqtariit meerartallit imminnut pilersornissamut suliffeqarnissamullu pitsaanerpaamik atugas-saqarniassammata?

Erninermut atatillugu sulinngiffeqarneq paaqqinnittarfinnilu neqoroortit kiisalu inuusuttunut angajoqqaanullu navianartumiittunut tapersiilluni siunnersuisarnermik neqeroortit siunnersuummi immikkut pingaaruteqarput. Naalakkersuisut tamakku misissuiffigineqarnissaannut isumaq ajunngitsutut isigaat.

Eqqoortumik iliornersugut sunilla aaqqitassaqaarsinnaanersugut ilisimasariaqarparput, taamaalilluni meeqqat siunissaat pitsaanerpaamik qulakkeerneqarniassammat.

Immaqa Nunani Avannarlerni inuiaqatigiit allat ilinniarfigisinnaavavut, minnerunngitsumik Nunani Avannarlerni allani inuiaqatigiit assinganik agguataarnerit tunngavigalugu: Utoqqaat amerliartorput taakkulu isumagineqarnissaannut suliffeqartut ikiliartorlutik.

Taamaammat qitiusumik allaffeqarfissuarmi isumalluutit eqqarsaatigalugit nassuiaatip aatsaat UKA2017-imi tunniunneqarnissaa allannguutigalugu siunnersuutip akuerineqarnissaa Naalakkersuisut inassuteqaatigaat.

Tamanna tunngavigalugu aalajangiiffigisassatut siunnersuummut allannguutissamik Naalakkersuisut imaattumik saqqummiussissapput: Ilaqutarittut inuunermut iluaqutaanerumik sulisoqarnermut politikkeqalernissaq anguniarlugu Naalakkersuisut UKA2017-mut iliuusissanik nassuiaasiornissamik peqquneqarnissaannik Inatsisartut aaliangiiffigisassaattut siunnersuut.